

# «I na fa senn da guardar enavos»

## Il secretari general da la Lia Rumantscha Martin Gabriel è pertschert da la sfida

CUN MARTIN GABRIEL HA DISCURRI  
ANDREAS CADONAU / ANR

**La retschertga che la Lia ha annunzià per evaluar ils basegns medials da la Rumantschia, tgi fa quella?**

**Martin Gabriel:** Quella fa Link, in institut che fa tut las retschertgas per RTR. E tenor la procedura dad eleger ils partenaris da discussiun da quest institut èsi garantì da retschaiver indicaziuns represchentativas. Nus avain evalua eventuals partenaris per ina tala retschertga en il Grischun. Per motiv dal temp stgars n'èsi betg reussì da surdar l'incumbensa en il Grischun.

**Pia ina retschertga che pertutga l'entir spazi rumantsch?**

Sa chapescha.

**Pertutgant la situaziun d'abunnts da la suletta gasetta dal di rumantscha è il resultat gia cler avant che la retschertga vegn lantschada?**

Daco?

**Il basegn per ina gasetta dal di na para betg dad esser avant maun?**

Il basegn è avant maun sch'ins resguarda la Surselva, el è avant maun sch'ins discorra da Rumantschs che vivan en la Bassa. In basegn datti plinavant sch'ins resguarda l'intent d'antruras da lantschar La Quotidiana. Il problem è la mancanza da l'acceptanza en las ulteriuras regiuns. Cun il project «Medias rumantschas 2019» vulain nus dentant betg guardar enavos, mabain enavant.

**Uschia pudessan nus era remartgar che la retschertga saja danvanz, ils**



En il focus da las medias pertutgant avegnir da las medias rumantschas: Martin Gabriel, secretari general da la Lia Rumantscha. MAD

**fatgs èn enconuscents, resultats substanzials novs na vegnia strusch a dar?**

Substanzial na forsa betg, sche jau pens dentant a las retschertgas dad RTR che han adina purtà novs ed impurtants aspects na crai jau betg ch'ils daners impundids per la retschertga sajan bittads or da fanestra. Tenor mes avis è la retschertga ina impurtanta part per definir la situaziun actuala. Per pudair dar a la radunanza da delegads da la LR dus, trais impuls infurmativs davart l'opiniun da la populaziun. L'institut ha da garantir che la retschertga è represchentativa.

**I fa plitost la parita che la Lia Rumantscha tshertgia la legitimaziun da sutterrare ses pop lantschà antruras, La Quotidiana?**

I n'è betg l'incumbensa da la Lia Rumantscha da sepulir il pop, anzi d'al accompagnar. El ha dentant cuntanschi ina tsherta vegliadetgna e basegna eventualmain in nov vestgi, quella vestgadira stuain nus cumprar e nus vulain savair nua cumprar il nov vestgi.

**L'elecziun dal nov vestgi num e simpel. Il pass actual tranter il vestgi da print e las colurs digitalas è difficil per**

**l'entira branscha. Ils basegns differents da la Rumantschia è in ulteriur fatg che na simplifitgescha betg la situaziun, il spazi da temp dad in onn per chattar ina soluziun è ulteriurmain detg sportiv?**

Quai è uschia, las tractativas da questa primavaira nun èn stadas simplas da chattar soluziuns main sportivas cun chantun e confederaziun. Er fitg sportiva è stada la comunicaziun da l'editor da chalar entaifer gnanc in onn. En vista a quellas premissas èsi stà cler che nus stuain esser anc pli sportivs e preschentar ina soluziun entaifer l'onn

2018. Ils daners publics èn sulet vegnids lubids cun l'empermischun da nosa vart ch'ina soluziun saja sin maisa sin il pli tard la fin zercladur da l'onn proxim. Per avair temp dad elavurar suenter las soluziuns.

**En tge direcziun sa mova il char. Ins discorra da la via enavos en la regiun, in pass insumma realistic?**

Sche quest pass è realistic, na pos jau en il mument betg giuditgar. La discussiun da regionalisar la pressa rumantscha è dentant avant maun. L'Engiadina n'ha betg discussiunà, ella ha simplamain realisà quai cun la «Posta Ladina». Pliaras persunas da l'Engiadina han sincerà che quella purschida tanschia per els. En la Surselva datti actualmain tshertas discussiuns da vulair turnar tar las gasettas regionalas. In trend ch'è dentant er avant maun tar las gasettas tudestgas. Autras vuschs apprezieschan fitg ils rapports che pertutgan l'entira cuminanza linguistica rumantscha. Jau na vi dentant betg metter fil en guglia. Igl è chausa dad in manader da project da preschentar soluziuns pussaivlas.

**La «Pagina da Surmeir» sco gasetta regionala rumantscha ha tsherts problems da chattar abunnts e da finanziar sia ediziun?**

E tutina s'identifitgeschan bunamain tut las Surmiranas ed ils Surmirans cun lur gasetta.

**E l'an, basegna quai insumma anc ina Agentura da novitads rumantscha entaifer quest scenario?**

I duvrass en quel cas vinavant redacturs locals e regionalas da la anr, quai che la anr fa gia oz per gronda part.

# Temp da grazia per La Quotidiana

## La Lia Rumantscha ha in onn temp da preschentar soluziuns realisticas per las medias rumantschas

■ (anr/ac) Da l'emprim da settember 2017 fin il zercladur 2018 ha in manader da project temp dad elavurar soluziuns durablas per las medias rumantschas, principalmain per las gasettas. La Quotidiana ha retschavi in temp da grazia fin l'onn 2018. In manader da project per definir l'avegnir da las medias rumantschas è en discussiun, i manca dentant anc il consentiment definitiv,

sco quai che la Lia Rumantscha ha tradi la gievgia passada a chaschun da la conferenza da pressa a Cuira. Tenor las explicaziuns dal secretari general da la Lia Rumantscha, Martin Gabriel, ha la Lia en vista ina persuna ch'enconuscha la situaziun da las medias grischunas. Bler temp per preschentar sia soluziun n'ha quai manader da project dentant betg. Enfin il zercladur 2018 sto la strategia

esser sin maisa. Quai è la pretensiun da chantun e confederaziun per segirar finanzialmein l'ediziun da La Quotidiana en fin l'onn 2018. Betg sulet las ediziuns da print pateschan en general dad ina digren dad abunnts e dad inserents. La midada digitala è per l'entira branscha ina sfida. Vitiers vegnan ils giavischs divergents da la Rumantschia pertutgant ediziuns regionalas e lingua scritta. Part

integrala da la nova strategia mediala rumantscha è ina retschertga represchentativa che vegn preschentada a delegadas e delegads sco basa da discussiun e decisiun en chausa e quai a chaschun da la radunanza da delegads da l'october 2017. Ina decisiun che duai esser in mussavia per l'ulteriur proceder en chausa medias rumantschas, sco la Lia Rumantscha scriva en ina comunicaziun. La gievgia passada èn il president da la Lia Rumantscha, Johannes Flury, ed

il secretari general stads a disposiziun per explitgar ils detagls da l'agir futur. Grazia a contribuziuns da chantun e confederaziun, da la Lia e da la anr è l'ediziun da La Quotidiana segirada en fin l'onn 2018. Ils custs restants surpiglia l'editor da La Quotidiana, la Samedia. Vinavant lubeschia l'import tant dal chantun sco da la confederaziun, da la Lia e da la anr da realisar il project «Medias rumantschas 2019» sut la direcziun da la Lia Rumantscha.



Per pudair survivor dovra La Quotidiana cunzunt dapli abunnts.

FOTO M. HARTMANN

## Posiziun da Samedia

■ La Samedia, l'editura da La Quotidiana, è satisfatga ch'ins ha pudì chattar ina soluziun per la cuntinuaziun da la suletta gasetta dal di rumantscha. La Quotidiana po uschia cumparar vinavant. La Samedia ha purschi maun per in cumpromiss ed ha renunzià a la mesadad da sia pretensiun. Quai vul dir ch'i resta vinavant in deficit che la Samedia surpiglia. En quest senn han ins chattà ina soluziun solidarica.

Impurtant per la cuntinuaziun da La Quotidiana è dentant er il dumber d'abunntas ed abunnts che gidan a garantir la survivenza da la gasetta. La Samedia spetga perquai che tut quels ch'èn s'exprimids en chartas da lecturs ed autras posiziuns sajan era pronts d'abunntar, inserar e propagar La Quotidiana. Nus quintain pia cun la cum-

prova en furma da numerus novs abunnts! Ina campagna correspudenta vegn Samedia a lantschar en il decurs da las proximas emnas.

Quai che concerna il project «Medias rumantschas 2019» stuain nus spetgar tge che sa resulta da la retschertga e tge rolla che La Quotidiana sa surpigliar entaifer quest project.

En connex cun la nova lescha da medias che cussegliera federala Doris Leuthard ha planisà duain era las relaziuns da las medias rumantschas vegnir regladas. Quai duai succeder en il senn d'ina soluziun generala per radio, televisiun, pressa ed online per la Rumantschia, sco quai che l'editor Hanspeter Lebrument ha postulà a chaschun dal giubileum da 20 onns da La Quotidiana.

Andrea Masiger, parsura dal directori e schef operativ da Samedia